



*Minggu, 19 Desember 2021*  
**Ogen: Pilemon 1:17-20**



**Ersenina I bas Kristus**



**L**it perbagidina bas geluh enda, adi seninanta si sada nanderas bapa mindo penampat man banta, megati la minter si sampati. Tapi adi lit teman meriahta, si nggo bagi seninanta e si akap, lenga pe ia mindo penampat minter si sampati adi kin si akap perlu ia. Ia pe bage ka nge perbahanenna man banta. Pernah nge si bagenda jadi pengalamendu? Engkai maka banci kalak ersenina, sada dareh la banci sikap perarihenna.

Menurut ilmu psikologi, lit kap istilahna *sibling rivalry* ntah pe persaingan ersenina. Rikutken pengangkan doni biasa nge si bage jadi, tapi rikutken ilmu psikologi bage pe i bas kinitekenta, si bage la payo. Uga cedana ukur Esau sabap kelengen ate nandena Jakup, bage pe uga cemburuna Jabup sabap bapana kelengen atena Esau. Erlumba ndarami kekelengen orangtua dungna salih jadi erlumba ngayaki erta tading-tadingen. Ia si sada bertin jadi dua kubu si radu ersegat ate, ertahun-tahun dekahna.

Alu la si sedari banci kita pe erbahan segat ate seninanta. Uga perbahanenta ersenina, bage ka nge perbahanenta man sangkep geluh ras kalak si deban. Emaka labo mamang ateta engkai maka Onesimus erbahan salah man Pilemon tuanna, sabap banci jadi maka ia nggo jadi budak i rumah kalak erkiteken la sikap hubungenna ras keluarganya. Tapi arah surat enda, ipetandaken Paulus me bana selaku keluarga Onesimus i bas Tuhan, bage pe ikatakenna man Pilemon maka ia pe ersenina i bas Kristus, gelah alu bage pola hubungan si mbaru e e me jadi palas, Pilemon nggit ngalemi Onesimus. Nggit ia ngalokenca mulihi, sabap kalak si ersenina biakna ersada, si tatang-tatangen, si alem-alemen salah. La lit si sempurna tapi adi nggit kita ersada si kurang jilena pe tambah nge jilena. Jesus selaku anak sintua si mpersadaken kita.